

摘藻堂四庫全書薈要

子部

欽定四庫全書薈要卷一萬六百十三

子部

御定佩文齋廣羣芳譜卷五十

花譜

菊花三

集藻七言古詩增梁簡文帝採菊篇日精麗草散秋株  
洛陽少婦絕妍姝相呼提筐採菊珠朝起露濕霑羅襦  
東方千騎從驪駒更不下山逢故夫 原唐杜甫歎庭  
前甘菊花庭前甘菊移時晚青蘂重陽不堪摘明日蕭

條盡醉醒殘花爛漫開何益籬邊野外多衆芳采擷細  
瑣升中堂念茲空長大枝葉結根失所纏風霜 增宋  
梅堯臣甘菊世言此解制頽齡便當園蔬春競種到秋  
猶得泛其英爛醉莫辭官有俸 和吳冲卿省中植菊

園果已熟實未墜野卉已老葉未瘁菊叢是時方發榮  
潭上籬邊俱有爲一從潭島輔長年一自籬根圖暫醉  
今將移近省中蘭壅培早與陶潛異黃土肥濃沃井泉  
朱欄屈曲侵堦地勁風不到何動搖清露能霑誰著意

看看重九各登高金蘂滿頭無所忌及此頻邀同舍歡  
向來莫羨鍾繇賜我家蓬藿不足云強對嘉章顏起愧  
歐陽修希真堂東手種菊花十月始開當春種花唯  
恐遲我獨種菊君勿謂春枝滿園爛張錦風雨須更落  
顛倒看多易厭情不專鬪紫誇紅隨俗好豁然高秋天  
地肅百物衰零誰暇弔君看金蘂正芬敷曉日浮霜相  
照耀後時寧與竹柏榮媚世不爭桃李笑煌煌正色秀  
可餐藹藹清香寒愈峭高人避喧守幽獨淑女靜容修

窈窕方當搖落看轉佳慰我寂寥何以報時攜一樽相  
就飲如得貧交論久要我從多難壯心衰迹與世人爭  
靜躁種花勿種兒女花老大安能逐年少 曾鞏菊花  
菊花秋開只一種意遠不隨桃與梅遊人有幾愛孤淡  
零落野水空巖隈層層露萼間枝葉金罍萬箇圍蒼苔  
直從陶令酷愛尚始有我見心眼開爲憐清香與正色  
欲搯更惜常徘徊當攜玉軫就花醉一飲不辭三百杯  
陸游山園草間菊數枝開席地獨酌屋東菊畦蔓草

荒瘦枝出草三尺長碎金狼籍不堪摘掃地為渠持一  
觴日斜大醉叫墮幘野花村酒何曾擇君不見詩人跌  
宕例如此蒼耳林中留太白 楊萬里買菊老夫山居

花繞屋南齋杏花北齋菊青春二月杏花開抱瓶醉卧  
錦繡堆涼秋九月菊花發自折寒枝插華髮湘纍落英  
曾幾何陶令東隣未是多吾家滿山種秋色黃金為地  
香為國就中更有一丈黃霜葩月蘂耿出墻飲徒無酒  
尋不得尋得一身花露香如今小寓咸陽寺有口何曾

問花事百錢擔上買一株聊伴詩人發幽意 病眼仇

冤一束書客舍葭莩菊一株看來看去兩相厭花意蕭

條恰似無清曉肩輿過花市陶家全圃移在此千株萬

株都不看一枝兩枝誰復遺平地拔起金浮屠瑞光千

尺照碧虛乃是結成菊花塔蜜蜂作僧僧作蝶菊花障

子更玲瓏翡翠六扇排屏風金錢裝面密如積金鈿滿

地無人識先生一見雙眼開故山三徑何獨懷君不見

內前四時有花賣和寧門裏花如海 林亦之奉題林

稚春菊花枕子歌故人所說菊花枕似把冰丸月下飲  
秋水一雙炯炯數在青囊第一品狂風江上吹蕪葭  
往往得之嵇阮家閉門誦書二十載眼睛損盡生空花  
建陽小作箸頭書殘更燈火亂蟲魚石渠文字大如斗  
塲屋歲月又不偶却來南山青草邊東西盡為菊花田  
手提長筐向山曲一下收拾三百斛昨者昏迷才起來  
解把簷頭小字讀乃知妙物通羣仙一切藥囊應棄捐  
謝枋得菊淵明豈但隱逸人淵明素懷諸葛志清香



不獨占秋天菊潭一滴三千歲 鄭思肖菊花歌太極

之髓日之精生出天地秋風身萬木搖落百草死正色

與秋爭光明背時獨立抱寂寞心香貞烈透寥廓至死

不變英氣多舉頭南山高嵯峨 金宇文虛中白菊西

風蕭颯百草黃南齋白菊占秋芳主人好事不專饗擷

送客館分幽香幽香清艷兩難得冰雪肌膚龍麝哀悄

然坐我藥珠宮玉斧瑤姬皆舊識仙家藝菊名日精我

今號爾為月英月中風露秋夕好感此仙種來曾城憑

君傳與金天令月與霜姿駐清景重陽好伴白衣來五  
柳先生憶三徑元范梈送菊卧病高秋留海浦明日  
重陽更風雨杜門不出長蒼苔令我天涯心獨苦籬角  
黃花親手栽近節如何獨未開含芳闕采亮有以使君  
昨暮徵詩來凌晨試遣霜根送畚土雖微甚珍重極知  
無意競秋光任作橫窓歲寒供憶我初客天子都西垣  
植此常千株結花年年應吹帽始信南邦事盡殊願得  
封培自今日何間朱厓萬家室秋香端不負乾坤但嗔

簫管亂傳匹歸去來兮雖得歸念歸政自莫輕違他日

采英林下酌誰向清霜望翠微 明吳寬過相城為沈

陶庵和天全翁賞菊之作菊花開日是重陽坡翁妙語

不可當我云但得花之趣何必秋來菊有黃神仙中人

壽且康老年見客纔下堂幅巾飄飄映華髮導我直過

東籬傍庵居春風定先到已見菊苗三寸長浩歌淵明

飲酒章悠然依舊虞山蒼素琴無絃舊有例當春賞菊

嗟何妨封題一笑報蘇子為我轉致陶柴桑 陳鴻買

西園菊至招同社諸人花下小飲因和短歌幾處菊花  
殘西園餘數畝買來竹窓下折簡會賓友把酒坐花旁  
一齊衫袖香春天百卉媚不及此幽芳堦下涼風薄暮  
起枝枝低拂深杯裏願君盡醉宿我家明日更看西園  
花

五言律詩增唐太宗賦得殘菊階蘭凝曙霜岸菊照晨  
光露濃晞曉笑風勁淺殘香細葉凋輕翠圓花飛碎黃  
還持今歲色復結後年芳  
駱賓王秋菊擢秀三秋晚

開芳十步中分黃俱笑日含翠共搖風碎影涵流動浮

香隔岸通金翹徒可泛玉笋竟誰同 李嶠詠菊玉律

三秋暮金精九日開榮舒洛媛浦香泛野人杯霍靡寒

潭側丰茸曉岸隈黃花今日晚無復白衣來 原李白

感遇可歎東籬菊莖疎葉且微雖言異蘭蕙亦自有芳

菲未泛盈樽酒徒沾清露輝當榮君不採飄落欲何依

增盧綸九日奉陪令公登白樓同詠菊瓊樽猶有菊

可以獻留侯願比三花秀非同百卉秋金英分藥細玉

露結房稠黃雀知恩在銜飛亦上樓 朱灣秋夜宴王

郎中宅賦得露中菊衆芳春競發寒菊露偏滋受氣何  
曾異開花獨自遲晚成猶有分欲採未過時忍棄東籬  
下看隨秋草衰 耿漳賦得寒蜂採菊藥遊颺下晴空

尋芳到菊叢帶聲來藥上連影在香中去住霑餘霧高  
低順過風終慙異蝴蝶不與夢魂通 顧非熊萬年厲

員外宅賞殘菊纔過重陽後人心已為殘近霜須苦惜  
帶蝶更宜看色減頻經雨香銷恐漸寒今朝陶令宅不

醉却應難

姚合病中辱朱諫議惠甘菊藥苗因以詩

贈蕭蕭一畝宮種菊十餘叢採摘和芳露封題寄病翁  
熟移茶鼎裏餐稱石甌中香氣將何比從來味不同

李商隱菊暗暗淡淡紫融融冶冶黃陶令籬邊色羅含  
宅裏香幾時禁重露實是怯殘陽願泛金鸚鵡升君白  
玉堂 許棠白菊所尚雪霜姿非關落帽期香飄風外  
別影到月中疑發在林彫後繁當露冷時人間稀有此  
自古乃無詩 李建勲採菊簇簇競相鮮一枝開幾番

味甘資麴蘖香好勝蘭蓀古道風搖遠荒籬露壓繁盈  
筐時採得服餌近知門 蕭或賦得菊送德林郎中學

士赴東府離情折楊柳此別異春哉含露東籬艷汎香  
南浦杯惜持行次贈留插醉中迴暮齒如能制玉山甘  
判頽 張蟪白菊秋天木葉乾猶有白花殘舉世稀栽  
得豪家却畫看片苔相應綠諸卉獨宜寒幾度攜佳客  
登高欲折難 原羅隱詠菊籬落歲云暮數枝聊自芳  
雪裁纖蘖密金拆小苞香千載白衣酒一生青女霜春



叢莫輕薄彼此有行藏 增僧無可詠菊東籬搖落後

密艷被寒催夾雨驚新拆經霜忽盡開野香盈客袖禁  
藥泛天杯不共春蘭並悠揚遠蝶來 僧廣宣九日菊

花詠應詔可訝東籬菊能知節候芳細枝青玉潤繁藥  
碎金香爽氣浮朝露濃滋帶夜霜汎杯傳壽酒應共樂

時康 宋韓琦菊萬卉趁枯死香金鬪晚葩甘名應得  
露野色豈如家俗態惜遲暮芳情誰怨嗟重陽樽酒伴  
不見牡丹花 菊觴九日陪嘉客金英泛酒船醺醅時

上下浮蟻自周旋香逐榴花發甘嗤柏葉先坐中宜醉  
挹仙錄載延年 重九席上賦金鈴菊黃金綴菊鈴充  
地獨馳名細蘂浮杯雅香簫貯露清風休沉夜警雨碎  
入寒聲自此傳仙種秋芳冠玉京 邵雍和張二少卿  
丈白菊清淡曉凝霜疎枝殿顥商自知能潔白誰念獨  
芬芳豈為瓊無艷還驚雪有香素英浮玉液一色混瑤  
觴 司馬光和李殿丞倉中對菊高士寄朝市迴然心  
迹殊秋風太倉裏黃菊滿庭隅陶令成詩後王公送酒

無遙知壓俗事未免強躊躇 文案漸消散倉閑吏已

稀庭空數蝶下夜靜一螢飛愛賞忽成句淹留時忘歸

高情雖不繫遇此獨依依 涼風正蕭瑟朋好復徘徊

幽興渺不盡芳樽時一開餘英益紅葉墜露濕蒼苔從

此東籬下應忘歸去來 和江隣幾金鈴菊何處見佳

菊秋風汶水陽酒浮金鐸細露汎蜜房香不謂紅塵地

相逢君子堂依然故人意不減舊芬芳 詠菊瑣瑣南

陽菊秋潭歲自開孤根擁紅葉落蘂媚蒼苔正以參靈

藥因之植紫臺願兼金掌露同入柏梁杯 野菊野菊

未嘗種秋花何處來羞隨衆草後故犯早霜開寒蝶舞  
不去夜蛩吟更哀幽人自移席小摘泛清杯 孔平仲

對菊有懷郎祖仁庭下金鈴菊花開已十分多情能惠  
我對景獨思君秀色三秋好清香一室聞扁舟今夜雨  
何處宿江雲 戴嵩十日取野菊從酒野徑菊仍好村

壚酒亦嘉未應今日藥便是背時花心在家千里身猶  
客九華官程難久駐風雨暮山斜 金党懷英黃菊集

句九月欲將盡鮮鮮金作堆  
遶籬殘艷密擁鼻細香來  
五色中偏貴羣花落始開  
可憐陶靖節共此一傾杯

元蒲道源九月十八日黃菊始開時  
且禁釀漫成示德衡弟苒苒秋事杪  
幽叢花始黃直須彫衆卉纔許見孤  
芳重露洗金質嚴風吹綠裳陶翁如  
有酒何日不重陽  
范梈九日諸生攜酒至城東看菊  
楚楚臨堦菊重陽  
特地開慰人良有意報汝愧無才  
巷杵聞雞發鄰觴送  
蟹來采英吾欲寄悵望倚江臺  
明高啓王公子宅五

月菊秋英忽夏發宛在阿戎家細認驚初見高吟喜共  
誇不依寒竹雨欲映午榴霞我意甘遲暮樽前有此花  
何景明汝慶宅紅菊紅菊開時暮亭亭冠物華亦知  
顏色好不是艷陽花羅綺嬌秋日樓臺媚晚霞清香如  
不改常傍美人家 八月二十八日子容過對菊近節  
逢花故開樽集異鄉乾坤共一笑風雨似重陽誰識暮  
蟬意獨憐秋樹芳他時益爛漫邀爾醉西堂 汝濟夜  
過同以行對菊花搖落相過地芳菲晚更親酒醺留媚

眼燈色笑生春風雨新晴夜江山未老身百年如不醉  
恐負此花神 原李夢陽菊花不隨羣草出能後百花

榮氣為凌秋健香緣飲露清細開宜避世獨立每含情  
可道蓬蒿地東籬萬代名 增陳憲章前菊會荒村開

紫菊細雨隔蒼梧漂泊逢山鬼歸來覓酒徒佳期賓不  
赴幽賞子何孤為罰南山老青錢買百壺 後菊會餘  
花留醉客缺月到疎梧我老真違世人生各有徒交遊  
今日少宇宙此亭孤慣得趨時理千金買一壺 後菊

會再次李九淵韻黃花憎競賞人事奪幽期長夜來尋

醉微霜落滿枝行藏深淺酒風月小囊詩長嘯東軒下

蒼髯白接羅 留連杯酒下重疊菊花期熟犬知過客

寒蜂亦戀枝溪山迴月色香影入梅詩地窄君休舞傾

斜爾接羅 楚雲臺觀民澤所栽菊寄民澤用昨九日

韻時民澤還五羊未返當軒玉朶孤植竹翠莖扶香細

風初動神清俗本無寒深溪井涸月出山瓢疎何處異

鄉客永懷歌茱萸 野菊吟寄子長再次前韻野菊生



何處尋香杖偶扶孤標猶訝絕佳色舊知無老弄真成

獨秋來不作疎金樽誰九日引滿對茱萸 吳明府送

菊次韻答之黃菊有名花淵明無酒官酒多人自醉花

好月同看老未厭人世天教共歲寒未應攜不去高步

蓬萊山 原申時行菊畦誅茆疏野徑種菊擬山家秀

擢三秋幹竒分五色葩凌霜留晚節殿歲奪春華為道

餐英好東籬興獨賒 唐文獻西苑宸遊地東籬菊已

花當年誇野色此日艷天葩輕白凌寒露深紅散晚霞

秋英疑可如無復楚人嗟

七言律詩增唐白居易酬皇甫郎中對菊花見憶愛菊  
高人吟逸韻悲秋病客感衰懷黃花助興方攜酒紅葉  
添愁正滿堦居士葷腥今已斷仙郎杯杓為誰排愧君  
相憶東籬下擬廢重陽一日齋 李商隱野菊苦竹園  
南椒塢邊微香冉冉淚涓涓已悲節物同寒鴈忍委芳  
心與暮蟬細路獨來當此夕清樽相伴省他年紫雲新  
苑移花處不取霜栽近御筵 和馬郎中移白菊見示

陶詩只採黃金實郢曲新傳白雪英素色不同籬下發  
繁花疑自月中生浮杯小摘開雲母帶露旋移綴水精  
偏稱含香五字客從茲得地始芳榮 李山甫劉員外  
寄移菊秋來緣樹復緣牆怕共平蕪一例荒顏色不能  
隨地變風流唯解逐人香煙含細葉交加碧露拆寒英  
次第黃深謝栽培與知賞但慚終歲待重陽 皮日休  
和魯望白菊已過重陽半月天琅華千點照寒煙藥香  
亦似浮金靨花樣還如鏤玉錢玩影馮妃堪比艷鍊形

蕭史好爭妍無由摘向牙箱裏飛上方諸贈列仙 陸  
龜蒙幽居有白菊一叢因而成詠呈知己還是延年一  
種材即將瑤朶冒霜開不如紅艷臨歌扇欲伴黃英入  
酒杯陶令接羅堪岸著梁王高屋好歌來月中若有閑  
田地為勸姮娥作意栽 重憶白菊我憐貞白重寒芳  
前後叢生夾小堂月朶暮開無絕艷風莖時動有奇香  
何慙謝雪清才詠不羨劉梅貴主妝更憶幽窓凝一夢  
夜來村落有微霜 鄭壁白菊白艷輕明帶露痕始知

佳色重難羣終朝疑笑梁王雪盡日慵飛蜀帝魂燕語  
似翻瑤渚浪鴈風疑卷玉綃紋瓊妃若會寬裁剪堪作  
蟾宮夜舞裙司馬都白菊恥共金英一例開素芳須  
待早霜催遶籬看見成瑤圃汎洒初迷傍玉杯映水好  
將蘋作伴犯寒疑與雪為媒夫君每尚風流事應為徐  
妃致此栽張貴白菊雪采冰姿號女華寄聲多是地  
仙家有時南國和霜立幾處東籬伴月斜謝客瓊枝空  
貯恨袁郎金鈿不成夸自知終古清香在更出梅妝弄

晚霞 宋韓琦九日賞菊未開席上次韻答崔象之寺

丞誰知九日接賓觴未放寒花拆露房早是生來悲晚  
節那堪開不在重陽滿頭且應良辰插一夜寧衰淺意  
香守待金鈴披絕艷共君辜藥醉餘芳 和崔象之紫

菊紫菊披風碎曉霞年年霜晚賞奇葩嘉名自合開仙  
府麗色何妨奪錦砂雨徑蕭疎凌蘚暈露叢芬馥敵蘭  
芽孤標只取當筵重不是尋常泛酒花 八月十九日

賞菊春英無不惜開遲秋菊常懷素景悲慣負晚霜甘

索寞忽逢先閨促離披欲移庭檻嫌傷早擬泛賓壘未

入時自是寒花當守分一違佳節速人嗤 王安石和

晚菊不得黃花九日吹空看野葉翠歲蕤淵明酩酊知

何處子美蕭條向此時委翳似甘終草莽栽培空欲傍

藩籬可憐蜂蝶飄零後始有閒人把一枝 蘇轍戲題

菊花春初種菊助槃蔬秋晚開花插滿壺微物不多分

地力終年乃爾任人須天隨七箸幾時輟彭澤樽罍未

遽無更擬食根花落後一依本草太傷渠 徐積菊花

為汝花中開最孤詩翁可惜屢提壺却應有意酬青眼  
渾似傾心向白鬚擊銅鉢時吟更好擲金錢後醉相娛  
楊妃只有黃裙在且問風霜留得無劉子翬詠菊青

叢馥郁早抽芽金蘂爛斑晚著花秋意祇應宜淡泊化  
工可是惜鉛華輕烟細雨重陽節曲檻疎籬五柳家暮  
醉朝吟供採摘更憐寒蝶共生涯楊萬里野菊未與

騷人當糗糧况隨流俗作重陽政緣在野有幽色肯為  
無人減妙香已晚相逢半山碧便忙也折一枝黃花應



冷笑東籬族猶向陶翁覓寵光 九日菊未花舊說黃

楊厄閏年今年併厄菊花天但按青蘂浮新酒何必黃

金鑄小錢半醉嚼香霜月底一枝却老鬢絲邊阿誰會

得開遲意暗展重陽十月前 九日郡中送白菊未應

白菊減于黃金作鈿心玉作裳一夜西風開瘦蕾兩年

南海伴重陽若言佳節如常日為底寒花分外香按蘂

浮杯莫多著一枝留插鬢邊霜 陳傅良和林宗易菊

花韻一歲所餘秋有幾重陽偏與老相催每憐白髮能

長健雖愛黃花亦懶栽好景游從須好友新詩風味似  
新醅人生適意無過此恣聽東籬早晏開 潘紫巖香  
名不枉入騷壇最愛霜林耐歲寒切莫逢人嘆遲暮何  
曾委地有飄殘人如靖節本堪採世欠靈均少得餐甚  
矣吾衰閉門坐籬邊自折一枝看 原方九功露冷江  
蘋鴈度時蕭蕭黃菊滿疎籬寒枝帶雨開仍艷晚節凌  
霜賞未遲移傍小簷承綺席縱觀深夜倒金卮摘來冉  
冉香盈把共泛西風醉莫辭 莫惜寒花開太晚孤懷

深喜客來雙疎枝最耐存霜圃晚節偏宜映月窓同調  
自應蘭是籍濁醪何有玉為缸籬邊無限陶潛興倒著  
綸巾醉未降 增金元好問野菊座主開開公命作柴  
桑人去已千年細菊斑斑也自圓共愛鮮明照秋色爭  
教狼籍卧疎煙荒畦斷壟新霜後瘦蝶寒蛩晚景前只  
恐春叢笑遲暮題詩端為發幽妍 晚景蕭疎畫不成  
晚花作意出繁英鮮明獨向霜露見爛漫却隨蒿艾生  
南國騷人知有待西風蝴蝶更多情南山正在悠然處

安得芳樽與細傾 為鮮于彥魯賦十月菊清霜淅淅

散銀沙驚見芳叢閱歲華借暖定誰留翠被鍊顏端自  
有丹砂秋香舊入騷人賦晚節今傳好事家不是西風  
苦留客衰遲久已避梅花 元王惲桃花菊淚灑明妃

寄露葩換根非為貯丹砂黃輕白碎空多種碧爛紅鮮  
自一家騷客賦詩憐晚節野人修譜是頭花九秋霜露  
無情甚時約行雲護彩霞 馬祖常雙頭菊金屈卮邊  
醉袖垂秋雲如幄貯仙姿寒生小靨迴鸞動香入流蘇

睡鴨移結綬巧承西顥曲落鈿羞帶月支着青霜為我  
催顥顥銀屋何人怨別離 菊枕東籬采采數枝霜包

裏西風入夢涼半夜歸心三徑遠一囊秋色四屏香牀  
頭未覺黃金盡鏡底難教白髮長幾度醉來消不得卧  
收清氣入詩腸 明高啟晚香軒不畏風霜向晚欺獨  
開衆卉已凋時地荒老圃苔三徑節過重陽雨一籬秋  
色蒼茫人醉少寒香落寞蝶先知山翁獨念同衰晚坐  
對幽軒每賦詩 原李東陽楊妃菊誰采繁花席上題

偶將名姓託唐妃日烘花萼醺時面雨換華清沐後衣  
隔座似邀秦國語揮毫未放謫仙歸欲從顏色窺生相  
已落詩家第二機 增李東陽月下賞菊東邃庵太常  
先生不隨春蝶夢滕王又送秋蟬過綠楊佳客到時非  
舊雨好花開處亦重陽為園恨少青山地插帽羞看綠  
鬢郎長對此花還此客縱教多病也身康 十月賞菊  
體齋席上限韻尋芳何意到君家雨過高城少暮沙此  
夜幽歡還月下去年孤館各天涯狂思晚節曾吹帽壽

擬春期及進瓜不是老來詩骨健誰能白髮對黃花

後園種菊經月忽見數花用亨父韻并呈城東賞菊諸  
君幽花種得偶相忘步轉南簷却背堂但有芳心寧擇  
地更無佳客亦宜觴登臨憶負重陽雨採掇愁沾昨夜  
霜滿袖餘香試披拂晚來風力正悠揚 九日盆菊盛  
開將出郭有作買得長安擔上秋南山只在屋西頭花  
開正好逢佳節身病那堪復遠遊昨夜月明空對酒晚  
來風急怕登樓多情重有燈前約為報花神作意留

周原已席上賦十月菊布袍蕭索不勝涼坐愛芳心共  
日光何用門前看五柳始知秋後有重陽故園栽處田  
應熟小市開時藥正香自古交期須歲晚相過不敢避  
風霜冬月對菊用陳玉汝韻搖落霜空萬木飛一枝  
無奈賞心微未成老圃應須學若在南山便合歸人道  
秋香非昨夜天留晚色共斜暉陶翁可是忘機者猶自  
含情待白衣吳寬原已宅賞菊休從雲外望天香誰  
似蕭然林下妝嫩蘂漸成黃面老低枝猶比白衣長曾



隨枸杞添風味却笑芙蓉住水鄉詩社清忙今又動看

花直擬過重陽次韻李士英劉道亨過園居看菊詩

人渾不厭貧家閒就荒園看菊花傾倒臘醅瓶未罄品

題秋色句爭嘉殘英抱節真霜傑本草言功有日華醉

後却勞歸騎晚西風烏帽數枝斜陳憲章九日晚對

菊次容處士韻是日縣主曹侯二尹邵侯持酒過白沙

李九淵容貫各館鄉中未還一年佳節到黃花霜在籬

根月在沙今日縣侯親送酒幾時詩客報還家疎枝向

晚青如許老鬢逢秋白未涯更欲西良開酒餞膝遊堪  
泛五更槎再用韻焉知老子非元亮請看黃花滿白  
沙賸有香醪供采采何須蠟屐到家屢經細雨開花  
面獨立西風背水涯欲把一株種蟾闕恐驚天女笑乘  
槎次趙提學十月賞菊韻不論開早與開遲到處逢  
花把一枝清獻插來紗帽重陶潛醉倒葛巾歌青藜不  
赴先生召白雪虛傳幼婦詞却對藥欄何意緒江門店  
酒獨斟時答吳樂善送菊兩莖何處萎霜根路入廬

山不問村佳節總非前日月新香猶裊舊龍門氣清天  
與金行秀色淺人知土德尊今日淵明不能領倒巾簷  
下弄詩魂何孟春送菊涯翁山徑曾陪九日遊數枝  
還為一尊留買從遠市聊供節裁向名園合擅秋漸老  
有人憐客瘦乍寒無計替蜂愁多情不用防吹帽短髮  
猶禁插滿頭熊卓汪司驥席上對菊錦席秋軒流客  
觴堦除遲菊戀年芳翠條冉冉初經雨青蘂娟娟欲候  
霜幸為分回供閨寂空然別去夢寒香小車如覓東溪

路古屋疎籬是醉鄉 喬長史詠醉楊妃菊娘娜嬌姿

不耐霜芳根移得在昭陽帶將春色三分艷散作秋陰  
滿院香傾日尚疑聞羯鼓臨風猶似舞霓裳祇愁野鹿  
偷銜去寂寞梨園空斷腸 原王世貞貪看晚節傲霜  
颺淡色幽香冷不辭入坐叵羅爭自引歸來款段未須  
騎推敲月下猶孤語競病風流彼一時若使東籬主人  
在攢眉那肯和新詩 增申時行對菊獨坐高齋汎羽  
觴且看叢菊媚重陽繁英乍吐丹霞色冷艷全分白雪

香好共清幽，矜晚節偏從搖落殿。秋光疎花短髮能相倚，三徑猶憐歲月長。婁東荆石公餉菊賦謝一水能通貫，月槎九秋偏贈傲霜花。瓊枝濯濯深含露，紫艷叢叢細吐霞。開傍松軒成晚節，分來蓬島是仙葩。試論禁苑追陪日，何似園林樂事賒。茅亭看菊小結茅，齋掩革門翛然風物似山村。一丘高卧身仍健，三徑新鋤菊尚存。麗色盈盈開錦障，幽香冉冉注清尊。誰知搖落風霜候，偏荷栽培雨露恩。原馬德澄秋深菊圃吹寒風

報道阿家花早叢鶯羽半遮西子白鶴翎斜映太真紅  
參差萬朶霜天曉稠疊千枝煙雨空肯與山樵分秀色  
移栽不遠過墻東吳執御水浸長天搖砌明亭亭珠  
玉綻秋英晚香冷秀經霜後淡意疎容與景迎籬下留  
連非藉酒雨中尋覓最多情飛塵不到莎廳下愛爾幽  
香浸骨清

五言排律原唐劉禹錫和令狐相公玩白菊家家菊盡  
黃梁國獨如霜瑩淨真琪樹分明對玉堂仙人披雪氎

素女厭紅妝粉蝶來難見麻衣拂更香  
向風搖羽扇含露滴瓊漿  
高艷遮銀井繁枝覆象牀  
桂叢慙並發梅萼妬先芳  
一入瑤華詠從茲播樂章  
增劉禹錫和令狐

相公九日對黃白二菊花見懷素萼迎寒秀  
金英帶露香繁華照旄鉞榮盛對銀黃  
琮璧交輝映衣裳雜彩章晴雲遙葢覆  
秋蝶近悠揚空想逢九日何由陪一觴  
滿叢佳色在未肯委嚴霜許渾南海使院對菊懷丁卯別墅何處曾移菊  
溪橋鶴嶺東籬疎還有艷園小亦無

叢日晚秋煙裏星繁曉露中影搖金澗水香染玉潭風  
罷酒慙陶令題詩答謝公朝來數花發身在尉佗宮

薛能詠夾徑菊夾徑盡黃英不通人並行幾曾相對綻  
元自兩行生叢比高低等香連左右并畔搖風勢斷中  
夾日華明間隔蛩吟隔交橫蝶亂橫頻應泛桑落摘處  
近前楹公乘億賦得秋菊有佳色陶令籬邊菊秋來  
色轉佳翠攢千片葉金翦一枝花藥逐蜂鬚亂英隨蝶  
翅斜帶香飄綠綺和酒上烏紗散漫搖霜彩嬌妍漏日



華芳菲彭澤見稱更在誰家 鄭谷恩門小諫雨中乞

菊栽握蘭將滿歲栽菊伴吟詩老去慵趨世朝迴獨繞  
籬遞香風細細澆綠水瀾瀾祇共山僧賞何當國士移  
孤根深有託微雨正相宜更待金英發憑君插一枝

宋錢惟演樞密王左丞宅新菊賀燕翻飛地靈芳茂遂  
時陰連桃李徑潤接鳳凰池夕照揮金葆輕風拂翠蕤  
露珠清自泣煙素引還披西顥霜雖勁南榮暖更滋擷  
芳多楚澤得地勝陶籬味可登蘭籍香應奪桂旗願公

長却老晏寢奉瓊卮  
楊億樞密王左丞宅新菊中樞

多暇日小圃占秋光雕玉新成檻繁金乍泛觴陶籬侵  
柳色羅宅掩蘭芳芝影連虛室萱叢接後堂傅巖猶借  
雨庾嶺未飛霜溫樹偏分蔭芸籤亦鬪香交枝迷露井  
墜葉點橫塘桐錄知延壽千齡奉紫皇  
劉筠樞密王

左丞宅新菊東閣留嘉客寒葩艷晚光秋風自蕭瑟台  
座對熒煌麗奪雙南價清含九畹香嶸山霜薦味太液  
鵠分裳已助蜂成蜜還隨蟻泛觴俯臨揮艾綬佩服間

萸房節物傳荆俗詩情掩謝塘更期松偃蓋永奉太清  
方李繼樞密王左丞宅新菊青規前席暇歸沐興何  
長北第秋將晚東籬菊正芳幽叢霏薄霧桂色艷輕霜  
已近黃金印兼臨白玉堂甘疑掩萍實秀肯讓芝房有  
佞還應指無憂可要忘藥浮丞相酒氣馥令君香好固  
松椿壽仙經識祕方元何中移菊僅得林間趣閒尋  
菊本移人家深竹裏楓葉夕陽時汲井澆畦潤將鉏下  
手遲護叢愁藥損帶土怕根知每被歸樵問深憐冷蝶

隨寒香生徑術幽事補灣碕斗柄西北落鴈聲霜露垂  
裴回繞叢畔自笑可能癡

五言絕句

御製九日對菊不與繁花競寒苞晚更香數莖偏挺秀嘉爾  
傲風霜

增唐陳叔達詠菊霜間開紫蒂露下發金英但令逢採  
摘寧辭獨晚榮 原杜甫復愁每恨陶彭澤無錢對菊  
花如今九日至自覺酒須賒 增李端和張尹憶東籬

菊傳書報劉尹何事憶陶家若為籬邊菊山中有此花

王建野菊晚艷出荒籬冷香著秋水憶向山中見伴

蛩石壁裏姚合詠新菊黃金色未足摘取且嘗新若

待重陽日何曾異衆人原賈島對菊九日不出門十

日見黃菊灼灼尚繁英美人無消息增杜牧將赴湖

州留題亭菊陶菊手自種楚蘭心有期遙知渡江日正

是擷芳時折菊籬東菊徑深折得自孤吟雨中衣半

濕擁鼻自知心錢翊江行無題叢菊生堤上此花長

後時有人還採掇何必在春期 晚菊遶江壘忽如開

古屏莫言時節過白日有餘馨 潯陽江畔菊應似古

來秋為問幽栖客吟時得酒不 宋徐鉉詠菊細麗披

金彩氤氲散遠馨汎杯頻奉賜緣解制頽齡 梅堯臣

殘菊零落黃金蘂雖枯不改香深叢隱孤秀猶得奉清

觴 司馬光晚行後園見菊戲宜甫野菊荒無數斑斑

初見花徑須求一醉試遣問東家 原楊萬里菊味苦

誰能愛香含只自珍長將潭底水普供世間人 朱子

菊青蘂冒珍叢幽姿含曉露政爾破荒寒詎免傷遲暮

王十朋佳節逢吹帽黃金染菊叢淵明何處飲三徑

冷香中 增金李俊民菊色笑秋光淡香嫌酒力慳東

籬在何處客裏見南山 明高啓菊蹊獨行林下路望

望南山暮無酒掇英嘗寒香已零露 陳憲章題淵明

菊籬下花堪把先生有酒不遙看白衣者不復問江州

對菊淅淅西風至為秋未有涯江邊聊一醉信手得

黃花 春事歸桃李西風響未休長官三徑晚丞相一

坡秋

天地花無數寒花色乃佳古詩拈未出除是長

官來

原李夢陽白鴈獨橫秋黃花伴醉遊眼看風物

換愁殺仲宣樓

增陳淳菊花清霜下籬落佳色散花

枝載詠南山句幽懷不自持

原于若瀛菊花冷艷吐

金英疎香入玉笋偏宜處士居不種朱門下

增王穀

祥菊颯颯金風度媽媽秋色妍白衣還自至青女更相

憐

六言絕句增明陳憲章周鎬送白菊乞詩陶令黃金遶



舍君家白玉滿園千古清風廬阜幾叢細雨江門微  
醉不須酩酊半開莫待離披安得季芳與語相思欲寄  
一枝白菊偏宜素髮青山只對蒼顏燕罷秋香滿腹  
風吹不到長安

御定佩文齋廣羣芳譜卷五十

謹案卷四十九第一頁後四行下木葉於中池厨烹野雁刊本池厨二字倒置據駱丞集改

第十六頁前五行曹叔文刊本文訛父據文苑英華改

第三十一頁後一行德備黃中美刊本備訛佩據宋詩改

卷五十第三頁後一行百錢擔上買一株刊本百訛間據誠齋集改

第十一頁前二行我意甘遲暮刊本意訛音據青

丘集改





總校官庶吉士 臣侍朝

校對官編修 臣朱攸

謄錄監生 臣魏綿曾

欽定四庫全書薈要

子部

御定廣羣芳譜卷五十一

二

詳校官主事臣陳本

欽定四庫全書薈要卷一萬六百十四子部

御定佩文齋廣羣芳譜卷五十一

花譜

菊花四

集藻七言絕句增唐白居易禁中九日對菊花酒憶元

九賜酒盈杯誰共持宮花滿把獨相思相思只傍花邊  
立盡日吟君詠菊詩重陽席上賦白菊滿園花菊鬱  
金黃中有孤叢色似霜還似今朝歌酒席白頭翁入少

年場 原元植菊花秋叢遠舍似陶家遍繞籬邊日漸

斜不是花中偏愛菊此花開盡更無花 增鮑溶暮秋

與裴居晦宴因見採菊之作菊花低色過重陽似憶王

孫白玉觴今日王孫好收採高天已下兩回霜 皮日

休軍事院霜菊盛開因書一絕寄崔諫議金華千點曉

霜凝獨對壺觴又不能已過重陽三十日至今猶自待

王弘 崔璞酬霜菊見贈之什菊花開晚過秋風聞道

芳香正滿叢爭奈病夫難強飲應須速自召車公 陸

龜蒙和崔諫議先輩霜菊紫莖芳艷照西風祇怕霜華

掠斷叢雖伴應劉還強酒路人終要識山公 憶白菊

稚子書傳白菊開西成相滯未容迴月明階下窻紗薄  
多少清香透入來 司空圖華下對菊清香裛露對高

齋泛酒偏能浣旅懷不似春風逞紅艷鏡前空墜玉人

釵 白菊莫惜西風又起來猶能婀娜傍池臺不辭暫

被霜寒挫舞袖招香即却回 為報繁霜且莫催窮秋

須到自低垂橫拖長袖招人別只待春風却舞來 登



高可羨少年場白菊堆邊鬢似霜  
益算更希沾上藥今

朝第七十重陽 原鄭谷十日菊節去  
蜂愁蝶不知曉

庭還繞折殘枝自緣今日人心別  
未必秋香一夜衰

增鄭谷詠菊王孫莫把比荆蒿  
九日枝枝近鬢毛露濕

秋香滿池岸由來不羨瓦松高  
日日池邊載酒行黃

昏猶自繞黃英重陽過後頻來此  
甚覺多情勝薄情

韓偓和吳子華侍郎令狐昭化舍人  
歎白菊衰謝之絕

正憐香雪披千片勿訝殘霞覆一叢  
還似妖姬長年後

酒酣雙臉却微紅 韋莊庭前菊為憶長安爛漫開我

今移爾滿庭栽紅蘭莫笑青青色曾向龍山泛酒來

宋韓丕詠菊冷淡花枝寂寞闌只緣開晚少人看若教

總似陶潛眼肯向芳春艷牡丹 王禹偁池邊菊綠池

繞迤幾千栽準擬登高泛酒杯未到重陽歸闕去金英

寂寞為誰開 韓琦重九菊未盛開席上偶成重九開

樽節未寒黃花初發葉皆單待看旬日金鈴綻刺得東

籬一醉懽 閱古堂前植菊二本九月十八日花猶未

開因以小詩嘲之只趁重陽選菊栽當欄殊不及時開  
風霜日緊猶何待甚得迎春見識來 原歐陽修菊共

坐欄邊日欲斜更將金蕊泛流霞欲知却老延齡藥百  
草摧時始見花 增王安石城東寺菊黃花漠漠弄秋  
暉無數蜜蜂花上飛不忍獨醒孤爾去慙勤為折一枝  
歸 詠菊補落迦山傳得種閭浮檀水染成花光明一  
室真金色復似毗耶長者家 院落深深數菊叢緣花  
錯莫兩三峯蜜房歲晚能多少酒盞重陽自不供 蘇

軾趙昌寒菊輕肌弱骨散幽葩真是青帟兩髻了便有  
佳名配黃菊應緣霜後苦無花 蘇轍五月園夫獻紅

菊二絕句黃花九月傲清霜百草滿園無此香紅紫無  
端盜名字試尋本草細商量 南陽白菊有奇功潭上

居人多老翁葉似蟠蒿莖似棘未宜放入酒杯中 原

黃庭堅誰將陶令黃金菊幻作酴醾白玉花小草真成  
有風味東園添我老生涯 呂園未肯輕沽我且寄田

家砌下栽他日秋光媚重九清香知是故人來 韓駒

九日東籬採菊英白衣遙見眼能明而今自有杯中物  
一段風流可得成 增呂本中謝送菊經旬霖雨足莓

苔忽喜雙盆送菊來已似風霜憔悴損主人云是待晴  
開 范成大菊樓東籬秋色照疎蕪挽結高花不用扶  
淨洗西風塵土面來看金碧萬浮圖 重陽不見菊二

絕節物今年事事遲小春全未到東籬可憐短髮空欹  
帽欠了黃花一兩枝 冷蕊蕭疎蝶懶飛商量何日是  
花時重陽過後開無害只恐先生不賦詩 重陽後菊

花二首寂寞東籬濕露華依前金靨照泥沙世情兒女  
無高韻只看重陽一日花過了重陽菊又新酒徒詩  
客斷知聞恰如退士懸車後勢利交親不到門 陸游  
九月十二折菊黃菊芬芳絕世奇重陽錯把配萸枝開  
遲愈見凌霜操堪笑兒童道過時 新菊已過重陽十

日期菊叢初破兩三枝自憐短鬢蕭蕭白不似黃花驛  
裏時 枯菊翠羽金錢夢已闌空餘殘蕊抱枝乾紛紛  
輕薄隨流水莫與桃花一樣看 積雪嚴霜轉眼空春

回無處不春風欲知造物無窮妙但看萱根與菊叢

嚴州多菊然率過重陽方開或舉東坡先生菊花開時  
即重陽之語余謂此猶是未忘重陽者恐此花不肯也  
戲作一絕無人喚醒賦歸翁滿把清香誰與同但辨對  
花頻舉酒莫橫重九在胸中 楊萬里詠菊物性從來

各一家誰貪寒瘦厭年華菊花自擇風霜國不是春光  
外菊花 黃菊鶯樣黃裳錢樣裁冷霜涼露濺秋埃比  
他紅紫開差晚時節來時畢竟開 陳傅良沈仲一送

菊自言封植之勞欲得詩為報為賦三絕東籬何在菊  
年年菊視陶詩竟孰賢未必緣詩花更好莫將詩與萬  
人傳 霜螯風味小槽春新樣宮衣試麴塵一段秋光  
誰領此芙蓉几子桂陳人 愁乾手自搭連筒苦雨丁  
丁棧小蓬乞得花開急催客明朝恐已著霜紅 高翥  
菊花四首白白黃黃自歲寒詩翁但作菊花看牡丹茱  
莉非吾事自是時人被眼瞞 親向東籬手自栽夕陽  
小徑重徘徊花應得似人乖角過了重陽爛漫開 愛



花千古說淵明肯把秋光不似春我重此花全晚節賸

栽三徑伴閑身

新分菊本自鉏山手縛枯藤作矮欄

比似著書空用力種花猶得一年看

原劉克莊菊羞

與春花艷冶同殷勤培溉待西風不須牽引淵明比隨

分籬邊要幾叢

翁浩堂秋風兩度身為客已見重陽

未到家村酒不堪供節事祇將青眼看黃花

趙信菴

城荒落葉風颼颼淮水茫茫古渡頭白首不堪行樂地

黃花點點是離愁

落托山園載酒來江梅含雪倚春

臺菊花無藉秋光老猶自離披帶雨開  
黃花照眼又

經秋山自青青江自流多謝龍頭鰲禁客年年把酒對

江樓  
增朱淑真黃花土花能白又能紅晚節由能愛

此工寧可抱香枝上老不隨黃葉舞秋風  
金宋九嘉

醑醑風味醺人醉著莫東籬愛酒翁一夜金英全換骨

冷香晴雪滿秋風  
段克己菊花霜風簾斜揭玉鉤欄

端正樓高燭影殘宿酒困人梳洗嬾從教殘粉浣金鈿

段成己菊花霜六宮試手學梅妝曾見飛英點額旁

香粉嚼餘濃不散唾花誤染縷金裳 李俊民野菊風

露叢中取次芳愁邊過却幾重陽秋光到處多無主不

是閑花不肯香 晚菊集句白露寒花自繞籬羊士諤從

他桃李笑開遲冉宗敏一年秋色吟中過沈彬門外重陽過

不知僧齊已元許有孚遶隄種菊酒熟同招隱士看饑

來忍把落英餐春風無限閑桃李不似黃花耐歲寒

明高啓九月八日對菊預向籬邊把一杯黃花多意已

能開不憂風雨明朝阻懶逐時人鬪折來 袁凱己未

九日對菊大醉戲作老夫愛此黃金蕊兒子須將白酒  
賒直到殘陽下天去更添燈火照歌斜 李東陽菊花

寒影蕭蕭照墨池西園晚色正相宜蒼顏黑髮秋風裏  
應是陶翁半醉時 題戴文進畫菊黃花開滿院前坡

醉殺西江計汝和忽見錢塘著色畫不知秋色較誰多

陳憲章對菊餐香誰亦到湘濱西掩東籬濫一巾去

歲金英曾照我今年玉蕊又驚人 秋英如雪照沙濱

板折須防小侍巾曲檻兩頭門盡掩先生原是惜花人

日日狂歌菊澗濱  
花神應識玉臺巾  
西風為掃繁華

去不遣紅芳近老人  
花舫誰撐綠渚濱  
道人醉脫碧

方巾東籬不飲江州酒  
彭澤當年未盡人  
扁舟何處

剡溪濱  
夜半歸來雪滿巾  
爭似一瓢秋菊伴  
漆園風暖

蝶疑人  
我貌不如蘇頲濱  
秋風華髮已盈巾  
有錢不

買重陽  
醉籬下黃花也笑人  
謝九江惠菊  
誰將此菊

種江濱  
物色當年漉酒巾  
若道淵明今我是  
清香還屬

隔江人  
紫菊移來紫水濱  
白頭對著白綸巾  
花前酌

酒笑未足酒後簪花笑殺人。故根迢遞九江濱。歲晚  
相看此道中。不用詩流強分別。種花人是賞花人。鶴  
袖披翻野水濱。黃花簪破小烏巾。腰間我有坡翁帶。解  
與西鄰賣酒人。次韻李子長寒菊四尺霜莖一寸葩  
幽香何只暗浮了。借令歲晚無人見。不做人間九日花  
水北一叢含數葩。梅梢寒月過籬了。茅茨可飢從人  
愛。不賣廬山半畝花。五月菊露飲霜餐。不記秋黃花  
三昧室中求。區區形色多相似。爭得先生為點頭。小

變春紅作淡裝山亭初見一枝黃醉中忽眩東籬眼起  
視金錢著屐忙 二項南風秣正青督郵未到長官亭  
眼前雖有黃花在不與陶公管醉醒 正月菊春到東  
籬花亦知紅桃白李更當時東風自領芳菲去也為秋  
香作意吹 廬阜高歌九日杯盡將秋意放花開誰教  
也向東風裏點破千紅萬紫堆 對菊因花催酒酒催  
詩詩酒平生兩不虧秋到若無詩與酒菊花元似不曾  
知 菊逕旁通水背村秋光蕩漾短籬門與儂別樣何

裝點笑插金英滿鬢根

映山映水兩三叢移上山亭

愛殺儂千古冷香吹不斷長官頭上帽簷風

沈周菊

秋滿籬根始見花却從冷淡遇繁華西風門逕含香在

除却陶家到我家

魏時敏賞菊短籬疎雨正離披淡

白深紅朶朶宜自計老年才思減重陽過後不題詩

原張本花上清光花下陰素娥惜此萬黃金一杯寒露

三更後誰信幽人更苦心

靳貴盈盈宮額半塗黃不

減花前舊樣妝笑殺阿嬌金屋貯香衾寒怯夜來霜



越孃初試素羅裳愛向秋風學靚妝一夜不勝瓊佩冷  
晚香亭館有新霜戴君恩芳叢曄曄殿秋光嬌倚西  
風學道妝一自義熙人去後冷煙疎雨幾重陽申時  
行冷艷疎枝擢素秋結茅相對轉清幽摘來自喜簪蓬  
鬢只恐黃花笑白頭于若瀛黃花應不插朱門自合  
移根老瓦盆露委烟斜看不足呼兒長夜倒芳尊陸  
氏澹雲微雨暮秋天為愛黃花帶晚烟聞說名園千百  
種願分秋色到籬邊

詩散句增晉陶潛我屋南窓下今生幾叢菊 唐孟浩

然誰采籬下菊應閑池上樓 李白手持一枝菊調笑

二千石 時過菊潭上摘此黃金花 因招白衣人笑

酌黃金花 攜壺酌流觴奉菊汎寒榮 原杜甫愁眼

看霜露寒城菊自花 羹煮秋萸滑杯迎露菊新 增

杜甫晚來高興處搖蕩菊花期 庭前有白露暗滿菊

花團 坐開桑落酒來把菊花枝 寒花開已盡菊蕊

獨盈枝 小驛香醪嫩重巖細菊斑 是節東籬菊紛

披為誰秀 采采黃金花何由滿衣袖 韓愈野晴山

簇簇霜曉菊鮮鮮 霜風破佳菊嘉節迫吹帽 鮮鮮

霜中菊既晚何用好 援菊茂新芳逕蘭消晚馥 白

居易籬菊黃金合窻筠綠玉稠 僧皎然九日山僧院

東籬菊也黃 宋蘇洵粲粲秋菊早卓為霜中英 司

馬光菊蕊如排粟青青見葉心 陸游英英籬下菊秀

色獨滿枝 原吳潛粲粲黃金裾亭亭白玉膚 王潛

齋輕霜臨菊月細雨似梅天 增金吳激憶省霜菊艷

不放酒杯乾 明沈周千古陶彭澤籬邊有此花 何

景明露蕊淒淒放風枝裊裊低 原唐杜甫苦遭白髮

不相放羞見黃花無數新 增杜甫籬邊老却陶潛菊

江上徒逢袁紹杯 韓愈墻根菊花好沽酒錢帛縱空

衣可準 白居易黃菊繁時好客到碧雲合處佳人來

杜牧別後東籬數枝菊不知閒醉與誰同 宋梅堯

臣黃金碎翦千萬層小樹婆娑嘉趣足 周必大陶令

思歸未得歸黃花想見繞東籬 陸游荒庭落葉不可

掃惟有叢菊爭先開 身閑亦未全無事檢校黃花幾

樹開 楊萬里菜子已抽蝴蝶翅菊花猶著鬱金裳

原徐似道牢裏烏紗莫吹却免教白髮見黃花 增祝

穆黃花自與淵明別不見閑人直到今 徐集孫莫言

滿眼無知已耐久黃花是故人 湛道山想得東籬黃

已徧到家及取未凋零 黃溪雲白衣不到東籬伴吟

得黃花滿口香 沈唯齋不因彭澤休官去未必黃花

得許香 吳荊谿問花何事人偏愛曾遇淵明把玩來

原張芸窓猶作霓裳舞妖態零紅墮粉濕秋痕 王

滄灣秋風為我語籬菊且耐寒香伴白雲 增金王良

臣月過初三半梳玉菊迎重九滿籬金 路鐸貞姿佳

菊秋霜裏真意南山夕鳥邊 元馬臻東籬滿地金錢

菊多謝西風為翦裁 原無名氏眼前景物年年別只

有黃花似故人 不許秋風常管束競隨春卉鬪芳菲

似嫌九月清霜重亦對三春麗日開 增晉張協寒

花發黃采 謝惠連白露滋園菊 江淹時菊耀巖阿

周明帝霜潭漬晚菊 庾信菊寒花正合 圓珠墜

晚菊 山枯菊轉芳 唐太宗岸菊初含蕊 花生圓

菊蕊 原德宗芳菊舒金英 郭元振延年菊花酒

趙彥昭紫菊宜新壽 增王績山菊秋自香 秋杯浸

菊花 王維陶潛菊盈把 儲光羲東籬摘芳菊 原

李白黃花催逸興 杜甫雨荒深院菊 異方初艷菊

輕露棲叢菊 菊蕊淒疎放 增白居易叢香近菊

籬 蕊拆金英菊 李嘉祐驚寒菊半黃 姚合西風

菊漸芳 霜落菊滿地 許渾菊艷含秋水 寒菊帶

霜甘 朱慶餘潭靜菊花秋 林寬微陽菊半畦 薛

逢持杯店菊黃 韓偓山菊向陽花 原魚玄機嫩菊

含新彩 增宋王安石沾裳菊露濃 蘇軾金菊亂如

沸 孫覲種芳茹秋菊 陸游買菊穿苔種 菊花寒

更香 金高士談寒菊過時花 元好問菊潭秋花滿

元蕭國寶霜菊間青黃 袁桷僧分墨菊芽 菊鑄

玉噴玦 宋无紫菊染巾香 黃庚菊殘如倦客 原



漢武帝蘭有馨兮菊有芳 增唐嚴武籬外黃花菊對

誰 白居易遠籬新菊為誰黃 露菊新花一半黃

許渾秋摘黃花釀酒濃 來鵬菊花村晚雁來天 羅

隱黃菊倚風催酒熟 韋莊紫菊亂開連井合 宋韓

琦金鈴千朵菊爭開 王安石鮮鮮細菊霜前蕊 歐

陽修野逕冷香黃菊秀 蘇軾菊殘猶有傲霜枝 孫

覲行穿野菊布黃金 戴昺一陣微風野菊香 金蔡

珪露華應到菊花團 高士談露蒙甘菊細莖紫 祝

簡菊著黃花旋旋開 史肅野性黃花無賴香 趙元

菊花雨似人情冷 麻九疇一雨初晴菊瘁花 元葉

顓黃菊飄香蜨滿枝 嫩菊半開香未老 西風細雨

黃花瘦

詞增宋張鎰如夢令野菊亭亭爭秀閒伴露荷風柳淺  
碧小開花誰摘誰看誰嗅知否知否不入東籬杯酒

劉克莊好事近秋色到東籬一種露紅先占應念金英  
冷淡摘胭脂濃染 依稀十月小桃花霜蕊破霞臉何

事淵明風致却十分妖艷 朱翌朝中措玉臺金盞對

炎光全似去年香有意莊嚴端午不應忘却重陽 菖

蒲九葉金英滿把同泛瑤觴舊日東籬陶令北窓正卧

羲皇 方岳一落索瘦得黃花能小一簾香杳東籬雲

冷正愁予猶幸是西風少 葉下亭臯渺渺秋何為者

無錢持螯對黃花又孤負重陽也 原歐陽修少年遊

去年秋晚此園中攜手玩芳叢拈花嗅蕊惱烟撩霧沉

醉倚西風 今年重對芳叢處追往事又成空敲遍欄

干向人無語惆悵滿枝紅  
張孝祥鷓鴣天一種濃華

別樣妝留連春色到秋光  
解將天上千年艷翻作人間

九月黃  
凝薄霧傲繁霜東籬恰似武陵鄉  
有時醉眼

偷相顧錯認陶潛作阮郎  
黃庭堅鷓鴣天黃菊枝頭

破曉寒人生莫放酒杯乾  
風前橫簾斜吹雨醉裏簪花

倒著冠  
身健在且加餐舞裙歌扇盡清歡  
黃花白髮

相牽挽付與旁人冷眼看  
南鄉子黃菊滿東籬與客

攜壺上翠微已是有花兼有酒  
良期不用登臨怨落暉

滿酌不須辭莫待無花空折枝寂寞酒醒人散後堪

悲節去花愁蝶不知 盧祖皋鵲橋仙寒叢弄日寶鈿

承露籬落亭亭相倚當年彭澤未歸來料獨抱幽香一

世 疎風冷雨淡烟殘照日日重陽天氣帽簷已是半

欹斜問甕裡新筍熟未 晏幾道破陣子憶得去年今

日黃花正滿東籬曾與主人臨小檻共折香英泛酒卮

長條插髻垂 人貌不應遷換珍叢又覩芳菲重把一

尊尋舊徑可惜光陰去似飛風高露冷時 增歐陽修

漁家傲九日歡遊何處好黃花萬蕊雕欄遶通體清香  
無俗調天氣好烟滋露結功多少日脚清寒高下照

寶釘密綴圓斜小落葉西園風嫋嫋催秋老叢邊莫厭  
金樽倒又青女霜前催得綻金鈿亂散枝頭遍落帽

臺高開綺宴芳尊滿按花吹在流霞面桃李三春雖  
可羨鶯來蝶去芳心亂爭似仙潭秋水岸香不斷年年  
自作茱萸伴又露裛嬌黃風擺翠人間晚秀非無意  
仙格淡妝天與麗誰可比女真裝束真相似筵上佳

人牽翠袂纖纖玉手按新蕊美酒一杯花影膩邀客醉

紅瓊共作熏熏媚 僧仲殊 驀山溪年芳已遠涼夏疎

疎雨菊占此時開背佳期清秋何處滴成金豆彈破栗

文圓臨水檻倚風亭全勝東籬暮 茱萸未結誰是多

情侶菖葉與葵花也相饒也相羞妬主人著意何必念

登高浮酒面解煩襟消盡當筵暑 原柳永受恩深雅

致裝庭宇黃花開淡佇細香明艷盡天助與秀色堪餐

向曉自有真珠露剛被金錢妬擬買秋天容易獨步

粉蝶無情蜂已去要上金樽惟有詩人曾許待宴賞重  
陽恁時盡把芳心吐陶令經回顧免顛顛東籬冷烟疎  
雨 陳亮秋蘭香未老金莖些子正氣東籬淡薄齊芳  
分頭添樣白同局幾般黃向閒處須一一排行淺深饒  
間新妝那陶令漉他誰酒趁醒消詳 况是此花開後  
便蝶戀無花管甚蜂忙你從今采却密成房秋英試商  
量多少為誰甜得清涼待說破長生真訣要飽風霜  
劉克莊念奴嬌老夫白髮尚兒戲廢圃一番料理餐飲



落英并墜露重把離騷拈起冷艷幽香深黃淺白占斷  
西風裏飛來雙蝶繞叢欲去還止 嘗試銓次羣芳梅

花差可伯仲之間耳佛說諸天金世界未必莊嚴如此  
尚友靈均定交元亮結好天隨子籬邊坡下一杯聊泛  
霜蕊

別錄增唐書韋綬傳綬感心疾罷還第九月九日帝為  
黃菊歌顧左右曰何可不示韋綬即遣使持往綬遽奉  
和附使進帝曰為文不已豈頤養耶敕曰自今勿復爾

抱朴子劉生丹法用白菊汁連樗汁和丹蒸之服一  
年壽五百歲 菊花與薏苡花相似直以甘苦別之耳  
菊甘而薏苦諺所謂苦如薏者也 清異錄廣陵法曹

宋龜造縷子膾其法用鯽魚肉鯉魚子以碧筒或菊苗  
為首 老學庵筆記遼相李儼作黃菊賦獻其主耶律  
洪基洪基作詩題其後以賜之云昨日得卿黃菊賦碎  
翦金英填作句袖中猶覺有餘香冷落西風吹不去

原夷堅志成都府學有神曰菊花仙相傳為漢宮女諸

生求名者往祈影響神必明告仙為漢宮女蓋在漢宮

飲菊花酒者或云成都府漢文翁石室壁間畫一婦人

手持菊花前對一猴號菊花娘子大比之歲士人多乞

夢頗有靈異 毫社吉祥僧刹有僧誦華嚴大典忽一

紫兔自至馴伏不去隨僧起坐聽經坐禪惟餐菊花飲

清泉僧呼菊道人 製用仙經重五日採白菊莖常服

令頭不白 九月九日取菊花末水服二錢治酒醉不

醒臨飲服方寸匕令人不醉 王子喬變白增年方用

甘菊三月上寅日采苗曰玉英六月上寅日采葉曰容  
成九月上寅日采花曰金精十二月上寅日采根莖曰  
長生並陰乾百日等分成日合搗千杵為末每酒服一  
錢七蜜丸桐子大酒服七丸三百日身體輕潤一年髮  
白變黑二年齒落再生五年八十歲老人變為兒童

垂露摘取甘菊去枝梗用淨瓦礫下安白梅一二個放  
花朵至平口又加白梅將鹽滷汁澆滿浸過花朵以石  
子壓之密封收藏至明年六七月取花一枝用淨水洗

去鹽味同茶末入碗注熱滾湯則茶味愈清而香藹絕

勝伴茶收藏不若此法 或用淨花拌糖霜搗成膏餅

食亦甚清雅 或用甘菊曬乾密封收藏間取一撮如

烹茶法烹之謂之菊湯暑月大能消渴每煮酒一瓶入

甘菊五六朶封嚴久愈香清花不可多多則味苦或旋

採細看心內無蟲者捻碎沖酒服亦妙 聖惠方云九

月九日取甘菊花曬乾為末每糯米一斗蒸熟入花末

五兩加細麴搜拌如常造酒法候熟澄清收藏每服

一二盞能治頭風頭眩暈 醫工或知忌野菊而並不識甘菊往往求盆盎中殘朵而用之夫華盛者實衰開殘者氣散是尚可以為藥乎甘菊香烈雖能燥濕祛風亦能助火泄氣宜酌而用之變白延年之說不可貪也以菊作枕者頭痛至不可救德善譜有戒 增花史千金方九月九日菊花末臨飲服方寸匕主飲酒令人不醉鄭景龍續宋百家詩云本朝孫志舉有訪王主簿同泛菊茶詩云妍暖春風蕩物華初回午夢頗思茶難

尋北苑浮香雪且就東籬擷嫩芽 洪景嚴遵和弟景

盧邁月臺詩云築臺結閣兩爭華便覺流涎滿麴車戶

小難禁竹葉酒睡多須藉菊苗茶 唐釋皎然有九日

與陸處士羽飲茶詩云九日山僧院東籬菊也黃俗人

多泛酒誰解助茶香陸放翁冬夜與溥菴主說川食詩

何時一飽與子同更煎土茗浮甘菊人或有以菊花磨

細入於茶中啜之者 文保雍菊譜中有小甘菊詩莖

細花黃葉又纖清香濃烈味還甘祛風偏重山泉漬自

古南陽有菊潭此詩得於陳元靚歲時廣記然所謂保  
雍之譜恨未之識也 原治地種菊之處須在向陽高原  
宜陰宜日風雨可到之所四旁設籬遮護圃內開作幾  
埂每埂置花幾缸缸之相去一尺五六寸僅容一人往  
來澆灌捕蟲缸下用磚石砌起以便走水傍設一小所  
以藏各色器具待花開移賞之後收根原藏此圃庶根  
苗不失而闕防有地 儲種花謝後即翦去上筭止留  
近根三五寸每缸插籌記認名色或於缸邊記號亦可



翦處用泥封口移至向陽處曬之土白燥時將肥水澆  
一二次天將大雪用亂穰草覆之以避凍損宜稀蓋不  
可過密密則苗黃又法以礬糠燒灰覆之可避寒氣天  
日晴和用糞搪揶菊本四邊勿著根春苗自旺交立春  
糞即少用有他處討來名花根接者明年花開必變即  
以原花枝梗橫埋肥地中每節自然出苗收起近中簞  
者則花本不變可得真種立春後天尚寒且不可輕動  
仍用草護其本則新秧早發壯大至二月內冰雪半消

方可撒去覆草遇奇種宜於秋雨梅雨二時修下肥梗  
插在肥陰之地加意培養亦可傳種 種子秋菊枯後  
將枯花堆放腴土上令畧著土不必埋時以肥沃之明  
年春初自然出苗收種其花色多變或黃或白或紅紫  
更變至有變出人所不識名者甚為奇絕 分秧春分  
至穀雨節內看天氣清明地土滋潤將舊收花本四圍  
掘出總根輕輕擊開勿損苗芽根鬚擇肥苗單莖不拘  
根鬚多少如在原本上者須近原本有節處分以其節

中生根方旺也秧根多鬚而土中之莖黃白色者謂之老鬚少而純白者謂之嫩鬚老可分嫩不可分有禿白根者亦可種活但要去其根上浮起白翳一層以乾潤土種之不可雨中分種令濕泥著根則花不茂土須鉏鬆不可甚肥肥則籠菊頭而不發須令淨去宿土恐有蟲子之害其地比平地高尺許每尺餘栽一株每穴加糞一杓塘掇如法方可搬秧植之四圍餘土鋤爬壅根高如饅頭樣令易瀉水菊根惡水水多必爛周圍留深

溝泄水但雨過不拘何月務將溝中水疏通流別處不  
分在地在盆即以酵熟乾土壅根或用箴簍瓦作盆埋  
地令一半入土內使地氣相接水不停積雨過便於上  
盆不傷根不泄元氣大笑及佛頂御愛黃至穀雨時以  
其枝插於肥地即活至秋亦著花豫章菊多佳者問之  
園丁云每歲以上已前後數日分種失時則花少而葉  
多如不分置他處非惟叢不繁茂往往一根數幹一幹  
之花各自別樣所以命名不同菊開過以茅草裹之得

春氣則其舊年柯葉復青漸長成樹但次年不著花第  
二年則接續著花仍不畏霜 登盆立夏時菊苗長盛  
將上盆先數日不可澆灌令其堅老上盆則耐日色每  
起根上多帶土先將肥土倒鬆填二三分於盆加濃糞  
一杓後搬菊秧植之再將前土填滿亦如饅頭樣種後  
必隔一日早用河水澆之又要搭棚遮避日色遇雨露  
揭去如久雨將盆移簷下長高尺許方可用肥仍以紅  
油細竹插傍用細椶寬縛以防風雨摧折竹用油可避

菊虎用椶耐風日凡要菊盛花大更無別法只是十一月大小雪中分盆邊旺苗栽之如未發苗有青葉頭白芽者種之遮霜雪要見日色開春花自盛 澆灌初種時澆水後得大日色曬三四日候天色晴燥早晚用河蕩水澆一次澆時須用盆緩緩澆透不透恐下邊土熱葉即發黃天雨不必澆既活長至六七寸長方將宿糞一杓水一桶和勻澆一次隔日又一次澆時須在雨過後一日若晴久土燥不可澆肥亦不可澆在花根邊令

根傷損先將缸內土四邊掘壅根上如高阜樣肥灌四周低處量看枝葉綠色深翠即止大約瘦者多澆肥者少澆否則令蕊籠閉青葉勝交芒種節後黃梅久極易傷根大雨時行尤為難看梅天但遇大雨一歇便澆須少冷糞以扶植之否則無故自瘁若厭澆糞用糞泥於根邊週圍堆壅半寸再雨濕泥功倍於糞且不壞葉六七月內不可用糞用則枝葉皆蛀每晨用河水澆灌若有搗雞鵝毛水停積作冷清或浸蠶沙清水時常澆之

尤妙尤須蓄土以備封培其根復生其本益固自此以後不可澆肥芒種後如苗瘦者止用汙泥水隔三五日一澆以天色晴雨為則六月大暑中每早止用河水澆此月天熱糞燥用糞則傷菊此後至花蕊發如黃豆大方澆清淡糞水一二次花將放時又澆肥一次則花開豐艷可觀此花大率惡水水多則有蟲傷濕爛之患紫金鈴一種忌肥喜陰又不可見水宜大樹下陰處種之畧見日影常令肥潤而已不可令中間頭長腦頭一起



即掐一段根下亂頭不可去待亂枝茂根瘦即花盛此種及蜜芍藥金芍藥銀芍藥不宜見糞惟沃以汙泥稀水紫線盤不宜見肥金鈴一種絕妙極難活但置陰處多見水不見肥東籬品彙云澆花以噴壺噴之最良

惜花秋時有狂風驟雨每本再揀堅直籬竹綁定用莎草從根縛二三節勿令搖動傷殘菊性畏熱須傍高籬大樹以避日色花開盛大不可置之日曬雨濯須放陰處以待夜露天寒有霜移置屋下根縛紙條就盞引水

使根長潤而不傷水則花久可觀葉秀可愛黃梅雨久  
花根浸爛花葉將萎即拔起翦去爛鬚止留直根重插  
平濕土內如插花法既可留種亦可有花 護葉養花

易養葉難凡根有枯葉不可摘去去則氣泄其葉自下  
而上逐漸黃矣根邊用碎瓦或花蓋密蓋防雨濺泥污  
葉或礮糠螺殼亦可葉有泥以清水洗淨各月皆然澆  
糞澆水慎勿令著葉一著葉隨即黃落欲葉青茂時以  
韭汁澆根沙缸下用大磚墊高缸底以走積雨則葉不

損如此護之則枝葉翠茂清晨葉帶露甚脆一觸則落  
一法以稻草翦作尺許分開縛在四圍根上去根四五  
寸許周圍分撒如蓑衣蓋泥亦是護葉一法四五月大  
雨腳葉易壞須設棚遮蓋 芟蕊長高尺許芒種節中  
每枝逐葉上近幹處生出眼一一掐去此眼不掐便生  
附枝掐時切須輕手左手雙指拈梗右手指甲掐蓋勿  
猛摘猛放蓋菊葉甚脆畧一觸即墮矣至結蕊時每株  
頂心上留一蕊餘則剔去如蕊細用針挑其逐節間或

先掐眼不盡至此時又結蕊亦盡去之隨加土平缸庶一枝之力盡歸一蕊開花尤大可徑三四寸惟甘菊寒菊獨梗而有千頭不可去立秋後不論枝長短並不可損蕊至黃豆大隔二三日澆肥一次則花大色濃至霜降花大發矣中有早晚不同開早者先移賞玩後開者又作一番其間不開放并零落者存之作本如欲蕊多至春苗尺許時掇去其顛數日則岐出兩枝又掇之每掇盆岐至秋則一幹所出數百千朵婆娑團圓如車蓋

熏籠人力勤土又膏沃花亦為之屢變菊之本性有易  
高者醉西施之類是也有原低者紫芍藥之類是也欲  
其低摘正頭欲其高摘傍頭庶無過不及之患 壓插  
五月梅雨時將摘下肥壯小枝長三五寸者齊節邊截  
取插入肥腴土內約寸半許以泥埋過節為止以其節  
能出根故耳移置陰處或用箔簾遮護令不見日頻以  
水澆間用肥水待至盈尺畧見日影至中秋不必遮藏  
與種菊同開但花略小耳可移盆中置几上清玩插大

芋頭內埋土中亦佳此根收起來年發苗更旺凡菊開  
花時有苗頭近梗掐下以污泥猪糞釀肥下花苗頭在  
內上蓋鬆泥此苗即活冬間分得芽頭須用猪糞釀泥  
種之凡壅花以頭垢不生莠蟲欲其淨則澆壅捨肥糞  
而用河泥紫金鈴及蜜芍藥紫牡丹白牡丹秋牡丹金  
寶相銀寶相紫寶相金邊紫鈴難栽宜多插栽接四  
月間梅雨時將賤菊本幹肥大者截去苗頭近根止留  
數寸將他色菊苗頭截下以利刀披削如鴨嘴樣將前

去苗頭本上以利刀劈開僅可容苗頭削枝插落即用  
麻線縛定以污泥塗之再以紙箬包裹至活方去則一  
本可容三色且至深秋接頭長完無痕可見 釀土種  
菊土力最要埴壤黃壤赤壤為上沙壤磧壤黑壤次之  
俱在每歲秋冬擇高阜肥地將土挑起潑以濃糞篩過  
雜以雞鵝糞壤令肥用草薦蓋之勿令泄氣正二月內  
再酵數次候至分菊時仍以細篩篩過用蚌殼搬入盆  
內五六寸許栽菊遇雨過根露覆以肥土可收雨澤不

使根爛菊喜新土大率每年換土分種若舊土恐力不  
厚花發瘦小初種土培十分之四至黃梅前三二日再  
培土三分雨後淋去再宜封培至蕊發如菜豆大掐後  
又培土二分以時消息又一法以肥鬆土用細篩篩入  
甌蒸二三沸取起倒出曬乾入盆植菊能殺蟲無侵蝕  
之患 蓄水蓄水之法花傍四角設四缸一蓄糞水一  
蓄汙肥水二蓄河水雨水澆花河水雨水為上洗鮮肉  
退雞鵝毛水縹絲湯俱佳釀雞鵝毛水法用缸盛貯投



韭菜一把或枇杷核則毛盡爛一云先時以死螻蟻水

澆花不生莠蟲又能肥花用糞各有次序一次糞二水

八越半旬第二次糞三水七再越半月第三次糞水相

半又越半旬第四次糞七水三第五次全糞可也救花

大肥用野芥菜子滿缸下之以減其力臘月內掘地埋

缸積濃糞上蓋板填土密固至春渣滓融化止存清水

名曰金汁五六月菊黃萎用此澆之足以回生且開花

肥潤 捕蟲初種時長至五六寸即有黑小地蠶嚙根

早晚宜看除之又生一種細蟲穿葉惟見白頭縈迴可用針刺死之立夏至小滿四五月中防麻雀折枝作窠雨過後或生青寸白蟲食腦葉或生如虱黑莠蟲以指彈梗去之時常須看芒種後四五月時有黑殼蟲似螢火肚下黃色尾上二鉗名曰菊牛又名菊虎或清晨或將暮或雨過晴時忽來傷葉可疾尋殺之此蟲飛極快遲則不及若花頭垂軟即看四圍鉗處用指甲摘去過傷處一二寸免致傷此一本此蟲一嚙即生子梗上變

作蛀蟲從損處劈開中有小蟲可撚殺之黃梅雨中濕熱時候葉底生蟲名象幹蟲青色如蠶食葉上半月在葉根之上幹下半月在葉根之下幹破幹取之旋以紙撚縛住常以水潤之花亦無恙至六七月雨過時又生細細青綿蟲食頭此蟲極難尋見可先看葉下有蟲糞如沙泥即蟲生處覓去之高僅三尺許摘苗之後小暑至秋分時常要省節邊蛀孔有蟲在內用針或鐵線插入孔上半月向上搜下半月向下搜蟲死即好枝上生

蟬蟲用桐油圍根上蟲自死癰頭者曰菊蟻以鰲甲置旁引出棄之瘠枝者曰黑蚰以麻裹筋頭輕捋去之無故葉黃色憔悴土內必有蟻螬或蚯蚓食根可用鐵鈎扒開根下土泥尋蟲殺之或以石灰水灌過以河水解之喜蛛侵腦當去其絲又防節眼内生蟲亦以鐵絲搜殺之蕊將發頭或蕊腦已發上生黑青莠蟲可用棕刷拂去間用茅灰摻蟲或以魚腥水灑之或將洗鮮魚水或死蟬水灑之葉上或種韭薤蔥蒜於菊根傍皆去蟲

法也常要除去蜒蚰則苗葉可免傷害 菊無染色藍

墨二色傳有染法須先多種一捧雪銀芍藥月下白三種花蕊將開用金墨研濃下油一二點或和以乳汁用牙刷濺墨剉入蕊心待露過夜次早又染凡三四遍則花墨色藍用新收青綿夜至露中候濕次早絞綿色水滴蕊中心開時花作藍色一法用礪砂一二釐入水用五色顏料俱可染花極易入瓣但花不耐久即便凋萎真賞者不取或於九月收霜貯瓶埋之土中菊有含蕊

調色點之透變各色或取黃白二色各披半邊用麻紮  
合所開花朵半白半黃如欲催花於大蕊時罩龍眼殼  
先於隔夜澆硫黃水次早去殼花即大開依法留之可  
至春初馬糞釀水亦可 花忌忌燥寒燥熱天色 忌  
大風大雨烈日 忌四圍高牆 忌地勢汙下 忌貪  
多助長如用確口硫黃馬勃催放藥物之類 忌孤高  
無傍枝 忌四面一齊似燈籠樣 忌圈縛盤結 忌  
麝臍觸犯

附錄 繡線菊

增史鑄菊譜繡線菊厭草花是也花頭碎紫成簇而生  
心中吐出素縷如線之大自夏至秋有之俗呼為厭草  
花或云若人帶此花賭則獲其勝故名之古有厭勝法  
也

附錄 藍菊

原藍菊花單薄而小其萼黃

附錄 雙鸞菊

原雙鸞菊一名鴛鴦菊即烏喙苗花開甚多每朵頭若僧帽拆此帽內露雙鸞並首形似無二外分二翼一尾春分根種

附文菊  
錄

原文菊一名西番菊一名迎陽花莖長丈餘幹堅麤如竹葉類麻多直生雖有旁枝只生一花大如盤盂單瓣色黃心皆作窠如蜂房狀至秋漸紫黑而堅取其子種之甚易生花有毒能墮胎



附錄 七月菊

原七月菊外夾瓣中鑲瓣突起如紫薇花色如茄花徑寸有半厚寸餘其葉似五月翠菊六七月花一株不過數朶高僅一二尺

附錄 翠菊

原翠菊一名佛螺一名夏佛頂蓓蕾重附層疊似海石榴花其花外夾瓣翠而紫中鈴萼而黃徑寸有半開於四五月每雨後及晡時光麗如翠羽開最久葉青而澤

似馬蘭香甚亞深莖毛而紅株幹肥勁高可二三尺八月種子

御定佩文齋廣羣芳譜卷五十一